

四庫全書

史部

欽定四庫全書

史部

雲南通志卷二十九之十二

詳校官給事中_臣李臺

刑部郎中_臣許兆椿覆勘

總校官知縣_臣楊懋珩

校對官典簿_臣汪日贊

謄錄監生_臣曹夢齡

欽定四庫全書

雲南通志卷二十九之十三

考

明

百濮考

布衣

董難

太和

牧誓庸蜀羌髳微盧彭濮人傳曰庸濮在江漢之南疏曰此八國皆西南夷也逸周書伊尹為四方獻令正南百濮爾雅南至於濮鉛鄭語叔熊逃難於濮而蠻楚蚡

冒始啓濮劉伯莊曰濮在楚西南左傳巴濮楚鄧吾南
土也又云麋人率百濮伐楚通典有尾濮木綿濮文面
濮折腰濮赤口濮黑棘濮周書王會篇卜人以丹砂注
云西南之蠻蓋濮人也諸濮地與哀牢相接余按哀牢
即今永昌濮人即今順寧所名蒲蠻者是也濮人之俗
用麋尾末椎其髻且好以漆飾面通典所云尾及文面
言其飾也木綿即攀枝花濮地多產之可以夾續言其
居產被服也折腰濮人見尊者則折腰以趨言其禮俗

也赤口濮人調舌為音如鸚鵡然言其舌聲也黑棘其
色多黑言其種類也濮與蒲字音相近今為蒲耳或
以全滇之地其人百種槩名曰濮亦甚謬矣百濮所居
連壤余又以棘音按之濮字在棘音亦合一屋韻蒲字
在棘音亦合七虞韻棘語稱其人為濮而不稱為蒲是
一證也又濮俗截大竹為筒以注水謂之濮竹如邕筒
之得名以此驗之益彰彰矣今之論百濮者既不得其
地又不得其音雖近濮地者尚爾懵然余因稽之載籍

證以方音作百濮考

序

唐

西南備邊錄序

失名

唐太和四年十月戊申制詔兵部侍郎臣德裕節度劍南西川維蜀西控戎索南接蠻服昔在中葉武尅不剛
蟲賊內訌蛇豕薦食表撐裏拓猶懼侵軼未陰綢戶莫
急二邊於是先事候情并謀合智料敵勢扼地險計軍

實而備邊錄作焉即十三卷之簡見萬里外之情所以
制勝無形銷患未萌也茲不可無序夫破敵於一方其
策易備敵於多方其謀難朔方既城薄伐于西文王其
勤也獫狁既攘鞠旅于南宣王之武也鉞芒瀉氣螳穴
潰堤智慮不周捍防不密則疆場之虞不生所備而生
所玩吁可懼哉然山川阨塞非圖莫見兵財盈虛非書
莫著是故軍防有錄譔于天寶九州別錄上於貞元禦
夷新錄奏於元和元振述安邊之策敬輿條備邊之失

前英後傑惟籌幄畫詳已然之變忽未動之憂寢薪為
安折柳為固猷之不遠寇將生心德裕身佩西陲之任
得不為南鄙慮乎方唐盛際德威溥揚北縻突厥東瞻
遼海窮髮反景悉主悉臣文恬武嬉喪羊于易吐夷開
釁河隴失險締從南詔協力謀我岷江飲馬倚為先鋒
井絡坤垠我圉孔棘有守曰臯鑿青谿道要結蠻好倚
鹿效順纂集事狀為卷十七質幣結轍闔戶誨盜戎膽
雖讐蠻禍始萌徑入成都如升虛邑唐之君臣日旰食

矣疇咨良翰矯失刷恥爰命德裕抗旌秉鉞葺殘奮怯
改紀其政乃建籌邊之樓凡險要與蠻相入者圖之左
與戎密邇者圖之右而部落饋餽靡不察乃立雄邊之
軍其精兵曰南燕及連弩騎士曰飛星及突騎而農戰
器械靡不飭大渡孰制城以杖義榮經孰控城以禦侮
西山孰阨城以柔遠復邛崃關徙越嵩治而蠻之齒寒
恒謀納款維州歸壁而夷之氣奪猶慮敵去而備弛也
兵將糧械之數城鎮種落之名歲計經用之目講求利

病輯為一書諸郡故實外夷情狀臚分縷析燦如指掌
勅立碑壘成以朱書總繪小圖標之首卷而第四卷序
維州本末尤悉書成于太和六禩迨會昌中秉國之鈞
始奏上之觀諸文集猶有可考二邊方騷而金湯之二
敵孔熾而霆雷之匪碩畫沈幾曷克臻茲藏之禁嚴副
在邊瑣日戒夕惕庶克有定大中而後怛憂好暇懷燕
安之毒玩鷙擊之形河湟歸疆西顧無騎塏矣厲階之
梗惟蠻為甚飴糠及米繇劍而嶺乾符之季有臣雲虔

自邕管涉川陸四十七程至善闡以南詔錄三卷獻于
朝吁德裕之錄以蜀備蠻藩籬之寇也雲虔之錄以邕
備蠻則闖然入戶庭矣憂先於事事至而憂奚翅銖石
之差與據往鑒新不可不悉患於微眇也易之蹇曰利
西南必有六二匪躬之臣而後能濟蹇難德裕以之按
唐藝文志是錄列在兵書今館閣書目存者一卷餘軼
不存我思古人愛莫起之撫陳編而三歎謹序

元

志略序

學士虞集
臨川

京師西南行萬里為雲南地方廣萬里昔我世祖伐而
取之守者勿能定既即位奠海內使省臣薩達克齊往撫
以恩惠沿俗而道之善利鎮以親王貴人者四十年方
是時治平日臻士大夫多材能樂事朝廷不樂外官天
子憫人之失牧也常簡法增秩以命吏而為吏者多徼
幸名器無治術無惠安遐荒之心禽獸其人而漁食之
無以宣布德澤稱旨意甚者起事造釁以毒害其人其

人故暴悍素不知教冤憤竊發勢則使然不然惡生樂死夫豈其情也哉嗟乎昔者簞壺迎篲之民日以老死且盡生者格於貪吏以自遠於恩化其吏士之見知者無所建白而馭於中者又不識察其情夫一隅之地常以為中國憂而論治者卒未究其故不亦悲夫河間李侯景山由樞密宣慰烏蠻烏蠻雲南一部也始下車未及有所施會羣蠻不靖按行調發餽給鎮撫周履雲南悉其見聞誌略四卷因報政上之余按而讀之考其土

產風氣服食之宜人物材力之愚智勇怯山川之形勢
阨塞要害而世祖皇帝之神威聖略概可想見未嘗不
俯仰而興歎也其志曰張喬斬奸猾長吏九十餘人而
三十六部盡降諸葛孔明用其豪傑而財賦足以給軍
國史萬歲貪賄隨服隨叛梁毘一金不取酋長咸悅李
知古以重賦僇尸張虔陀以淫虐致亂此於事至較著
明白者也其術不甚簡易乎有志之士尚有所覽焉至
讀其紀行諸詩必有悲其立志者矣

明

董莊愍死節威楚序

參政王奎
松陽
謫戍

龍亡虎逝而羣狐嗥風披雲靡而雷霆作此可以覩大
人之變明治化之迹也按元史龍溪集紀天厯初雲南
中慶路鎮將敗狐叛遣兵攻威楚官吏或逃或屈獨知
事董文彥義不從賊銳聲詬罵賊不忍聞截其耳以塞
其口文彥嚼血唾賊罵不絕聲賊怒裂而殉之明年敗
狐伏誅憲司以事聞朝廷嘉之諡曰莊愍旌其門官其

予時中予斥臨安時中為文學掾一如集中言泣且請
曰先父不幸死賊手雖褒嘉於朝時中懼其事之荒湮
也先生以文章顯幸為我序之嗚呼忠臣烈士何代無
之求之夷服曾不多見昔安祿山以范陽反顏杲卿死
河北張巡許遠死睢陽雖武夫小卒皆知盡節闔城皆
然華夏忠義之習無怪也唐史列之於傳植大義於後
世者至矣敗狄之叛中慶大藩也威楚大都也省府大
臣不死之風紀執法不死之刺史不死之知事一夷人

耳食九品秩乃凜凜乎仗大義樹大節寧死而不顧見
理明而臨事不眩也使天下之人皆若文彥則叛亂何
繇而生哉予生也後仕不先人不獲與太史著作之列
而元史不載莊愍死節事宜史闕歟抑在夷略歟抑述
史時雲南未附不得聞歟以未附闕文君子固不能無
憾以在夷而略則失之遠矣因為述之於簡以補史氏
之闕

通志序

巡撫 鄭 顯 錢塘

景泰甲戌孟秋七月有詔纂修方輿志書禮部奏選文學之士授以條畫分行天下俾其所至會諸方岳儒臣廣蒐精擇計偕以上而進士王穀實來雲南衆議右布政使陳君安簡宜總其事君承事惟謹暨諸文儒夙夜在公殫心竭慮期蒐訪之必精尋故鈎新在去取之皆當不四越月而志書告成將鈐梓以傳詣予丐言為序惟雲南之事載在漢班固西南夷傳者舊矣至元李景山始為志略然其時聲教初及制度簡率文章之事未

甚明備道德風俗之美未甚同一宜乎蒐訪者難精而該載者不博也我朝奄有天下幅員之廣疆域之大振古莫及雲南以險遠後服太祖皇帝特命勲臣鎮之迄今七十餘年山林川澤墳衍原隰物產之富郡縣城郭疆理之雄靈壇古跡琳宮梵宇之勝園池樓閣亭臺館榭之麗賢臣哲士之生於其鄉仕於其地詩書禮樂之教養其人於是道德既同而風俗丕變矣孔子曰如有王者必世而後仁此其時耶雖然禮樂文章之明備道

德風俗之同一固由悠久教化之浹洽然非得人纂修
抑何以成昭代制作之盛而觀今日大一統之寰區哉
是書遠稽諸經近考史籍并疆里俗食貨藝文之事古
今因草損益之宜條分縷析明白詳盡可謂無遺漏矣
而陳君蒐訪去取之當亦於是而有可考焉

滇候記序

楊慎

見前

遠遊子曰千里不同風百里不共雷日月之陰徑寸而
移雨暘之地隔壟而分茲其細也太明太蒙之野戴斗

戴日之城或日中而無影或深暝而見旭或銜燭龍以
為照或煮羊脾而已曙山川之隔闕氣候之不齊其極
也是以有測景之圭有書雲之臺有相風之竿有候風
之律海有星占河有括象以此知其不齊也故曰不出
戶知天下天下誠難以不出戶知也非躬閱之其載籍
夫九邱之書志九州之異也佚而不傳周處作九州風
土記宗懷作荆楚歲時記至於巴蜀異志嶺表異錄皆
是物也余流放滇越溫暑毒草之地甚過從晤言之適

幽憂而屏居流離而閱時感其異候有殊中土輒藉而
記之豈欲妄意古人乎他日冀萬一釋其棘矜歸於氓
蚶焚枯酌醴班荆坐茅與擊壤之老聚沙之童晨夕話
之亦可以代博奕之為矣

雲南鄉試錄序

楊慎

聖天子嗣大歷服之十九年寔惟閏之一章入庚子部
首粵當三物賓興期雲南巡按御史某申令甲嚴法癸
葺試賓曷文軌業爰飭其故期不愆於素乃以布政司

某司調按察司某司監郡大夫若吏部大夫邑郎官洎
流末官咸慎選精遴昉局隸事罔弗虔學官某輩若干
人應聘以屆罔弗共闔滇之校四十有二入彀之士二
千有奇皆提學副使某所曉擇也先長夏回星淖雨湛
聲及初商應律啓霽升陽乃甲子鑠院御史炳蕭誓衆
曰天公矢慎乃違此二天昕有如日暝有如燭乃臚唱
諸士而試之戊辰一之辛未二之甲戌三之題則紬簡
刺之卷則分經閱之公簾以內司試者鏑之交交如也

鰓鰓如也公簾以外司調司監者分職之魚魚如也雅
雅如也御史又寔臨內外而網維之翼翼如也井井如
也拔簡其試之中得廿人鍤雕其文之優廿首為雲南
庚子科鄉試錄以獻某濫竽校簡拜手颺言曰大道散
而有六經六經散而有諸子諸子之是非取裁於六經
六經之刪修折衷乎聖道三代而上道見於事業而流
衍於文章三代以還道寓於文章而不純於事業故鄉
舉里選取其事業矣敷奏明揚取其文章矣兩漢以經

術對策取士六朝以品薦詞華甄人隋合南北始有科
舉最盛於唐增光於宋而其得人之效視三代蔑矣我
太祖高皇帝重獎天衷再造人極埽舊元之晦盲否塞
復三代之純固惇龐日而月之星而辰之彞而倫之文
而章之君師之道兼隆仁聖之事畢矣嘗伏讀科舉之
詔矣易用程子傳朱子本義書從夏氏蔡氏兩傳詩米
漢箋暨集傳春秋本三傳兼胡氏禮記則古註疏與陳
澠集說裁訂自淵衷參采乎諸儒使孔孟復生亦無異

論也又嘗觀先正首科之題辭矣曰初場在通經而明
理次場在通古而瞻辭末場在通今而知務上之涵養
乾知大始下之承順坤作成物菁莪樸棧之化梓材多
士之興良有以也丹青既久而渝神化亦窮以變厥今
士習何如哉其高者凌虛厲空師心去迹厭觀理之煩
貪居敬之約漸近清談遂流禪學矣卑焉者則掇拾叢
殘誦貫糟魄陳陳相因辭不辯心紛紛競錄問則呿口
此何異瞍矇誦詩閤寺傳令乎窮高者既如彼卑論者

又如此視漢唐諸儒且慙焉況三代之英乎聖祖制舉之美意舉賢求士之良規豈端使之然哉今皇上遠述唐虞近法聖祖屢下明詔銳意作新文必宗經必法古必崇雅必黜浮菁莪之詩梓材之書復作於今日收濟濟之士迓穆穆之衡行媿於古先諸士乎沐薰濡化提耳面命是十年之期而一朝之遇也况爾滇雲聖祖常有諭言曰氣厚風和君子道行之所爾諸士子生其鄉邦久佩謨訓矣一人之身且有新吾三日之士尚猶刮

目矧曰涵泳已百七十載濟濟數三五六經諸士勗哉
今日之滇雲非昔日之滇雲矣勗哉不以一第自滿而
以三代之英自獻某也願徵榮靈假於諸士子僭書以
俟

大理府志序

楊慎

大理滇西繁雄郡也緣洱水出罷谷為西南巨浸蒼山
像靈鷲為西南巨鎮而襟帶而巖險而物華而人英又
褒然育煥然縹犁然有當於中土之輿區卓乎無謝於

南溟之奇甸焉嘗稽之往籍緯書云神農地過日月之
表則日表骨利月表青邱溟池比之猶為邇封陸終為
黃帝之所娶若水為顓頊之所生厓里為湯亳之貢國
濮人為武牧之征隊載籍昭然可以覆視矣待常顙為
通道始而唐蒙為開郡先乎昔之郡乘方志事狀行紀
若韋臯若徐雲虔若竇滂若樊綽若韋齊休若陳隱之
所著雖曰臚列實則錄存書亡若勝國之李景山昭代
之王景常籍焉具存然或失之誤或失之略山河若柯

戒而以一經行盡之幅員數千里而以一卷帙約之原本山川有憑其能說極命草木無裨於多識矣柱史溫泉郝公繙舊志而病之乃徵議於督學憲使默泉吳公叅伯龍山沈公僉憲膠峰安公板令於太守黃巖蔡公蔡公奉楮及幣禮謁給諫弘山楊公荆守侍御中谿李公二公家本郡人官舊史氏多識前代之載且諳土著之詳於是摭懷舊之蓄念發思古之幽情立創新例大增舊文閱數月而新志成集二美而卷帙合時則黃巖公

政成化流之暇宅生居方之餘也而古跡英躔琳宮寶
地表昔賢之遺愛供騷人之景物者一一鼎新之賁飾
之輪奐之詠之榜之不翅柳吳興之蘋洲謝宣城之
疊嶂矣其為新志之助不亦多乎慎也恩譴喬土流成
滇陰紫城蒼麓夙嘗受館僦廬香界迴岑昔饒解鞍橫
枕乃以首簡屬之孱毫非敢曰僭杜征南之先固願附
張京兆之後云爾

通志序

御史

李元陽

太和

前史稱兩漢四履之盛東樂浪西燉煌南日南北鴈門西南永昌永昌在南中為遠郡舉遠以見近也漢章帝元和間滇池出龍馬四白鳥二因徧置學校漸遷其俗由此言之雲南在漢文約之所漸被聲教之所周流其來久矣據兩漢書武帝元狩間置益州等四郡領縣四十有二其時循吏王阜張喬等十有二人至唐天寶以後邊吏無良群夷忿怒始有割據之禍宋室之興棄而不取二百年間隔為異域兩漢風猷斬然莫繼嗚呼士生

斯時能不荒陋者寡矣。刳文獻哉。我高皇帝恢復華夏。莫正區宇。置雲南郡縣。視兩漢有加焉。英皇命儒臣用禹貢職方之遺意為輿地一統志。而雲南之建置至為明備。正德間前輩括圖經為雲南志。尚多闕略。隆慶六年。大司馬關西蘭谷鄒公開府南中。首詢闕事。惟時方伯長樂師岡陳君學憲長樂一水。陳君以通志對公曰：「一方圖籍豈宜久闕。遂命有司以六十年來諸所損益約四十餘條。徧布列郡。俾覈實以報。藩臬諸大夫謂陽。」

齒居鄉右或識往事因屬筆焉頃之學憲蒞郡得以咨
白義例面承指授然雖勉強操觚恒以年終為懼會大
巡侍御解州兼山侯公陽信振樓馬公新鄉養齋郭公
相繼按蒞皆蒙贊其決樂其成事有不容中已者乃遵
一統志約其凡目粵稽歷代史山海水經諸子藝文汲
冢周書以明其疆域土貢之離合采說文通典玉海鄭
漁仲馬端臨之志考以證其經營廢置之因由遠取晉
常璩南中志唐樊綽雲南志以及韋臯崔佐時徐雲虔

所為南詔諸錄近取臺院司道興革損益兵饟經費一切成規攬撫野史蒐訪耆碩言有物而事有程然後取法各省通志張立題部犁為十有二類而以事目繫之治道莫先於域民故以地理為之首庶政必遵乎制置故建設即次之民財民力其道貴節故賦役又次之禦侮備乏其道貴豫故兵食又次之養士以成賢育才以致用故學校科目又次之吏於其上而功德可思生於其鄉而行誼可述故官師人物又次之祀典在所必敬

百神有時而宗故祠祀寺觀又次之稽往詔來必資辭
令故藝文又次之羈縻雜志末之以此十二類括數千
里華夷之地貫穿二十府古今巨細之事比次以倫追
引無間析而第之為一十七卷豈敢遽言成書譬彼繪
事先為素地云爾若夫品藻宦業予奪人物則有宗工
鉅匠持衡於上非陽所敢預也

重觀溟海序

給事中
楊士雲

太和

本朝聲教四訖稽古作程內簡臺史外列臬司觀風於

天下一人大觀在上四方觀化於下非省方觀民何以
設教嘉靖乙丑聚峰毛先生以臺史觀滇維時中官肆
虐罔遏巨室封利罔懲戎心叵測罔馭曰茲惟亂本不
可長亟疏論狀咸得請大閹罷鎮群醜懾服迄於今賴
之報命中傷左官壬寅以僉臬再至再巡洱海攝詰戎
兵維時熨昨久逸難變陵德敝化難閑草竊潛作難弭
甚而金沙可達難於謀始曰茲亦惟亂本毋狃乃教民
事必民淫嚴斥埃議請疏江圖永久餘風用殄畢棄咎

亦罔不咸賴升庵太史題重觀滇海張之鄉大夫士歌
之進予序之於乎觀之時義大矣觀之初六童觀罔鑒
趣順謂之童觀斯昧六二闕觀寡鑒從順謂之闕觀斯
狹六三觀我生自審行可謂之生觀斯察六四觀國之
光明習國儀謂之光觀斯有融先生德兼三四應上近
五故茲觀風上裨大觀下裨觀化隼可射狐可獲戎可
戒孚可草寇可禦大川可涉觀民設教明哉熙哉滇職
永利休哉可歌已予聞在昔介軒王公澤州楊公觀滇

有辭罔俾二公專美西南又可歌已其諸觀陝與天下者咸若是獨滇乎哉庸附羣言之首

試田圖籍序

尚書

包見捷

建水

萬厯戊午滇闡論秀會侍御潘公攬轡至綱紀其事作人之效煥然改觀間者滇人士先後鱗集昆明庶得其二迤道里疲露狀慨然興愾謂管子伯者猶曰士首國之四民不可使雜處而令其言龐其事亂故聖主處士必於燕閒誠慮之也比歲黔士良病遠涉業稍營公田

庶幾少瘳今每飯未嘗不在牀牀也方書俱在豈真黔
一體而二視之遂一意節嗇廩費裒若干金購田若
千畝約三稔課輸租若干金以給全省應比諸士爰刻
田之圖籍用識不朽一日函書南浦問叙不佞不佞竊
歎公澄清萬里功績卓爍非一而此舉之大有造於滇
人士也語曰一歲樹穀百歲樹人以滇渺焉天末徼聖
朝道化翔洽士類蒸蒸羔鴈成群制科之額視昔浸加
乃士子丁風簷下筆陣詞鋒譬之於戰鹿鳴鶚薦目之

為捷浸假士不紛志於旅資有彙征于泰茅皆作于公
之醪續以賈其餘勇則其志開而神王也夫然故公之
養士為造士愛人為知人其樹風聲於滇者意可謂宏
遠矣乃滇人士宜何如祈嚮以報公哉昔宋有饗士者
登歌四章曰山曰水曰鴻鴈曰松柏而蘇子瞻繹以勉
士之動欲難進靜欲及時為學而志於得其道至其論
稼又惓惓於完地利識天時耕穫有度而津津稱古人
之大過人者在博觀而約取厚積而薄發要非區區博

一第明得志者至今讀其言凜凜為俗學之戒然則公之望我滇人士之得售者想亦予瞻之深意也夫千里比肩累世接踵士倘有意力田逢年乎宜益知勉學以無為石田庶不負公矣

本朝

通志序

總督

范承勲

奉天

滇志何昉乎蓋自晉常璩倡之於前唐樊綽元李京之徒踵事而增華焉迨明聲教日闢景泰間右

藩陳安簡奉詔纂修為書四卷嗣是李元陽包見
捷劉文徵之數子者後先纂述滇志亦漸備矣獨
是數十年來疊遭寇亂典章散軼即於灰燼之餘
偶得殘篇要皆存什一於千百其失也或病其略
歲癸亥我

皇上特命儒臣纂修

大清一統志

詔天下各進省志於時滇以逆孽初平諸務草創僅襲

舊文攬撫近事遵部限而上之未及精詳其失也
或譏其濫略與濫皆不可以垂永久況滇雖遠在
天末其山川險易建置因革與夫政教之興衰吏
治之得失民風之醇疵是皆治滇者所宜亟講也
詎可忽諸臣於二十五年欽奉

簡命來制茲土見兵燹之餘其生齒凋耗尚未盡登也
制度頽廢尚未盡舉也賦役繁重尚未盡復也文
教尚未盡修武備尚未盡飭也日夜兢兢蒿目而

憂嘗望古遙集欲得往代之賢臣善政奉為楷模而則倣之乃檢點遺文得其梗概三代以前無攷矣由秦漢以迄於唐大率皆羈縻弗絕治人治法蓋寥寥也元之賽典赤其區畫經營之事至今父老猶能言之緬其遺躅邈然難追有明樹藩建節繫豈無人及末造法隨時敝以致豕突鴟張之輩職為厲階稽往事者每有遺憾焉自

本朝戡定以來我

皇上軫念遐荒

恩綸疊下山川日益莫麗夷漢日益安帖溝洫日益
疏濬土田日益開墾熙皞耕鑿者民風絃誦詩書
者士習休息而蕃衍者戶口輸將而恐後者貢賦
雖山澤魚鹽之利不敵中州而樹畜稼穡之勤漸
臻樂利撫今追昔未有如我

國家之聲靈遐暢遠邁千古者也當此之時使滇志
猶然闕略其何以揚太平之盛治昭大一統之弘

規也哉臣因會疏

題明載為續纂拜疏之日即嚴行設局敦請紳士以
郡臣丁煒總其務學臣吳自肅督其成務令序次
有規編輯有體分條析目據事直書既不敢失之
略亦不敢失之濫庶幾滇乘有成書可垂之永久
而告無過也已於以獻之

當寧遐荒萬里如在目前安在志滇之書不可以為治
滇之書也臣謹序所以纂修之由拜手颺言於簡

端

普濟堂條規序

巡撫管
總督事 鄂爾泰

滿洲

天下聞有衰羸疲癯殘疾之人而不為惻然動心者哉無有也古之王者深憫乎此載之王制著之周官頒之月令其所以用意者至厚而所以為之經畫者亦至深且遠也後之君子踵而行之於是乎有養濟院之設由來舊矣我

皇上加意養老曠典頻頒而於衰羸疲癯殘疾之人所

在存恤

京師廣寧門外有普濟堂者日活數千人以為常予過其地輒式焉矜其人也敬其事也及奉

命來滇百務待舉揆政所先無急於此於是飭藩司委邑令鳩工庀材堂以落成定為規條以垂永久俾世世遵行勿替凡以仰體我

皇上軫恤斯民惻隱時切之意云爾夫滇屬在邊方

君門萬里似此焚獨幾無可告哀矣不意

王風所被無間遐邇俾生斯地者與

輦轂之下衰羸疲癯殘疾之人初無以異則孰不扶
杖感泣願須臾無死以觀德化之成也雖然不唯
其政唯其人不唯其始惟其終倘有其舉之莫或
廢焉我唯願官斯土者依成法而守之當如一日
也是則予之所深幸也夫

斯文精萃序

總督

尹繼善

滿洲

滇黔粵三省地處極邊自古人文之盛弗逮中土

國家養育百年聲教四訖我

皇上加意作人敦崇實學仁漸義摩之治舉遐陬僻壤
咸耀於光明癸丑春

詔天下設立書院

特賜帑金以資膏火所以育人材弘造就者恩至渥也
數年來封疆大吏蒞茲土者皆能仰承

聖意化導多方購置經書增葺學舍以廣招徠邊方之
士咸知觀感奮興蒸蒸然漸趨於盛然傳人代少

讀書講課之法罕有師承且道路崎嶇書籍難致
其書院所藏又卷帙浩繁類非篇篇可讀人人得
見者雖有矯然傑出之質而見聞弗廣誦習無資
學者苦之余既蒞任之明年頑梗悉除疆圉寧謐
顧維幅員遼濶苗獮錯居獷悍成風易動難靜非
以詩書禮樂之教涵濡而馴擾之難望其化氣質
而移習俗爰舉書院事宜與撫軍張覲臣學使吳
穎菴藩司陳汝咨悉心籌畫立條約選真才延明

師贍廩給凡所措置勿涉虛文冀收實效而又念
士子無書可讀也于是裒集制藝詩古文詞每體
各選一冊旁搜博採悉擇理法竝到辭意兼工者
然後入選凡幾閱月而書告成名曰斯文精華竊
思讀書之要博學於文學問之道擇焉務精余少
居遼海孤陋寡聞早列科名遂登仕版於文章甘
苦原未深知嗣宦遊文物之邦名山石室頗足取
資又因案牘勞形未遑旁及今者忝任苗疆一切

籌邊裕餉吏治民生正多有志未逮何敢從事章
句學操選政以博虛名雖然教育英才大臣之職
也培植文風師長之責也職無可諉責無旁貸而
或因陋就簡奉行故事士習何由丕振故於簿書
之餘不辭焚膏繼晷與二三同志互相考定以成
是編而又以購書無多古今之英華不無遺漏此
余之不能無憾於斯文也然是編也雖選錄稍隘
實體無不備擇無不精無論自童子以至館閣應

世之具取之裕如即舉數千百年以來君臣之詰
誠政治之張弛凡有益於身心學問之事無不具
載非徒可以文章目之者而且簡而能該要而不
煩炳炳烺烺可歌可誦三省之人苟能奉為模楷
寔力研求因文以致行明經而達用則上可以黼
黻

休明下可以教行鄉里邊境之人文駸駸日上庶無
負

聖天子興賢育才之至意及使者殷殷誘掖之苦心況推而廣之海內之士或留心採擇不廢揣摩亦未始非學業之一助云

趙州志序

巡撫張允隨

奉天

天下郡國之有地里志自漢班固始原於禹貢治之周禮彬彬然可誦也後世郡邑州都建置因革更易代殊名稱之習考據者惑焉及唐杜佑宋馬端臨先後作通典通考薈萃天下之山川人物列

為一部較之班志又為加詳矣然唐宋時西南叛服不常若浮若沉負版不載以是杜馬亦所從略蓋春秋謹嚴於內外之辨者此物此志也我

皇朝誕膺

天命統一華夷幅員之廣古今莫及而疆理之制則以京畿郡邑直隸六部天下分為十四布政司以統諸府州縣於是而各有志書紀其地里雖相沿於前代乎然蟠木流沙無雷向日靡不來庭而來王則

合諸志之全而大一統焉蓋於斯為極盛者也雍正十年

世宗憲皇帝特命詞臣纂修一統志分行各省修輯通志以備采擇雲南為梁州裔境自漢置益部以來稍通中國至今漸被

聖化百年而後禮樂可興此其時矣省既開館延文學之士以黼黻之外而各府州縣皆同時興舉而趙州於滇亦推人文勝地故其為志獨能本諸經史

弗諛弗誣此不持作者之學有本源亦以徵夫毓
秀鍾靈人可傳而事足信者匪徒以書肆說鈴觀
之也州牧程近仁來請序予維趙之於滇抑傳所
云叢爾國者也然自設州治以來四百餘年其間
風俗之澆淳治理之得失田土之蕪闢人才之盛
衰與時而遷變者多矣今

聖天子在上加惠元元遐荒萬里之外若照几席守土
之官但能宣布

皇上德意以俾恩澤下究於百姓而不邀近功小利塗飾觀聽冀博才能之名則趙之民不將蒸蒸興起而悉臻夫至化之域也哉伏讀

上諭云治天下者在於治天下之人心必使民氣和暢民情豫順快然知有里井之可安恬然知有室家之可樂斯為無象之太平閭閻實被其澤此必直省中息事寧人安全休養道在於優游馴致而非可取必於旦夕間也大哉

王言所當共勉夫奉宣德化教養斯民者守令職也巡
省風俗而以愛民為稱職督撫大吏事也倡率鼓
勵寧敢他諉故因趙州志之序而愷切言之嗚呼
亦豈獨為趙州之志而言之也與哉

重刊四禮序

陳弘謀

見前

型俗莫善於禮而成教必始於家家而無禮則名
分乖愛敬薄俗之流失端必由之紕陽朱子折衷
古今損益羣籍著家禮一書瓊山邱氏因其父行

為儀節海內通行久矣萬厯中商邱宋栗庵先生
省其繁重為四禮初稿大要不失朱子本意而節
目簡易人不必縉紳家不必閥閥胥可行之余嘗
謂是編也宜於中原寒素之家尤宜於邊方側陋
之族是深得乎禮之意而通之不愧為朱子功臣
也鈇板已失流布未廣欲重刊以行而因循未就
今年春承乏滇藩滇地僻遠書籍罕至而夷漢雜
居鮮克由禮其須是編也尤亟因鈇梓以行而朱

予通禮司馬氏居家雜儀呂氏居鄉雜儀并婦人
拜考証亦附刊焉誠使家置一編講明而遵守之
於型方訓俗之道不無小補顧余涼德不足以感
化斯人而地位與民弗親又不能躬進斯民而一
一與之更始則夫不鄙余之迂拙而推而徧之設
誠致行使教興於家而化成於州郡實於親民之
良有司有厚望焉

重刊近思錄集解序

陳弘謀

子朱子與東萊先生讀周子程子張子之書擇其
關於大體切於日用者編為近思錄凡格致誠正
之方修己治人之要節目詳明體用兼備朱子曰
四子者六經之階梯近思錄者四子之階梯又以
窮鄉晚進有志於學無良師友之助者得此亦足
以得其門而入朱子誘掖後學之苦心尤在於此
平岩葉氏用力於此書最專且久所著集解原本
朱子舊註叅之諸儒辯論而附以已說明且備矣

弘謀服膺此編攜之篋衍近見滇中罕所流布因
出以重付梓人將散之列郡俾義塾家塾人置一
編也夫滇士之有志於學者多矣得此編而沉潛
玩索切已體認依類貫通由是以求濂洛關閩之
全書以窮六經之奧旨當必有深造自得而不能
自己者此余所切望於滇人士也刊既竣敬書於
簡端以俟

重刊小學纂註序

陳弘謀

五方風氣殊矣民生其間不能無剛柔輕重遲速之異而原其本始性善皆同古之聖人修道立教萃天下子弟於黨庠術序而訓之以彛倫日用益豫防其天性之漓而以蒙養為作聖之功意深遠矣子朱子所著小學其事切於童蒙而其理徹乎上下本之經傳稽諸往跡廣之以嘉言實之以善行所謂小學一書乃做人榜樣者此也今者躬逢聖世化民成俗之方至周至備各省書院絃誦多人固已

十五國同風矣弘謀承乏六詔職司旬宣得陳請
兩臺於所部郡縣廣設義學欲使邊方士庶均沐
聖朝雅化則敦本行崇實學宜首務矣會梁溪顧右卿
先生掌教五華書院出篋中所攜然超高君所輯
小學纂註以示余余讀之愛其詮解明備考校無
訛尤便初學因重為刊板附以童蒙須知頒之通
省學塾俾遠方之士父師以是教子弟以是學所
謂習與智長化與性成異日明體達用胥於此立

其基安見遐陬僻壤不可以敦本崇實之教教之
也哉

引

本朝

臨安重修瀘江橋引

知府

張無咎

掖縣

橋以利涉苟無關於水患一鄉之善士可為也即
為之亦不必急若瀘江橋水患之所關甚鉅者也
橋跨瀘江之中上游自異龍湖至者四十餘里其

間白泥螞蝗諸溝沙石奔赴以十數計皆壅積河
底水之去橋者三四尺耳所謂楚牙鴈齒渺不得
見矣當秋之交陰淫為虐山潦交瀉汹涌之勢不
得遽達漫橋而過不獨居民累月苦水而數十里
隄防往往崩潰泛溢彌望洪濤郡之為害者此為
最也前此歲歲修築但委之民便而為愚民惜力
不實心禦患屢屢上憲憂余奉

命蒞任之初灼知其故爰與臨鎮及州牧祝君合謀捐

俸數百金廣儲椿石遴員分督尅日興工浚河三尺以培兩埂於受水之區倍加指授雜植樹木務期一勞永逸雖煩民弗恤也於是上自謝家灣下迄巖洞昔之頽基斷埂者今則周坦堅厚可容車馬河患庶幾可免矣而橋之低平如故但橋不高難瀉水勢水勢難瀉則兩堤不易保橋之增高可一刻緩哉再捐俸為倡以郡人傅翁董其事雖責屬獨任而力須衆成俾其形勢穹隆吐納百川於

以永慶安瀾資灌溉而茂桑麻千溝萬畝咸食盈
寧之福者其為功不僅在往來利涉已也然則斯
舉也寧可緩乎為序橋之當急以為勸其事者勸
馬時雍正八年之月日也

跋

明

禹碑跋

舉人 張 含 永昌

於乎禹功神矣禹文亦神矣萬世永賴惟禹功四海永

敷惟禹文萬世賴其功故百靈護其文矣鏤夏鼎藏包
湖廬阜予乃攬之詞孤山記道里之刻皆不可見可見
惟此岫嶠碑一爾皇帝立元嘉靖之十有六載仁洽虞
夏文貫姚姒滇蒙小子邇如皇畿得觀岫嶠刻集成不
能識其全既歸滇覩蜀都太史慎釋文字為之影句為
之音含驚且喜曰何文苑藝林舉昧焉而楊子獨識之
乎既而思曰夫禹生於石紐廣袤蜀之文禹開之也楊
子生於蜀其所謂江漢炳靈世載其英將顯茲神禹之

迹而默啓楊子邪故曰聖人為天口賢人為聖譯信夫
初楊子讀此碑不得者四字夜條夢黃衣魚首人告之
曰此南瀆衍亨也篝火而覓之良若契焉故曰思之不
通鬼神將通之故曰天地有官陰陽有藏待時顯也昔
司馬遷亦漢太史也南探禹穴弗獲覩茲竒何楊子洎
予生後史遷幾二千年而幸獲見之乎故曰飛龍在天
位乎天德見龍在田天下文明時之顯也義遠矣哉鏤
鼎藏山之文將次第顯乎

滇載記自跋

楊慎

見前

史稱西南夷靡莫之屬以什數滇最大元封中以兵臨滇王舉國降然而未有稱也及張氏受姓後世迭君長者蒙氏鄭氏趙氏楊氏段氏高氏凡七姓惟蒙段最久故著稱焉夷裔盜名號互起滅若蜂蟻然不足錄也然至與中夏交綏接刃疲我齊民世主甘心焉以無用戕有用是可慨已漢司馬氏傳西南夷誠有意哉余嬰罪投裔求蒙段之故於圖經而不得也問其籍於舊家有

白古通玄峰年運志其書用契文義兼象教稍為刪正
令其可讀其可載者蓋盡此矣滇契於三代為荒服漢
僅標分其方雖元以兵力勝之而不能守也於今列菁
落而郡縣之馴鱗介而衣裳之華風沃澤同域共貫昭
代恢宇前此孰竝傳稱神農地過日月之表幾近是哉
夫分隔之亂昔如彼大一統之治今若此干羽不警百
五十年探言其故則金匱秘文縉紳罕覩况荒徼乎余
慕宋司馬氏作通鑑采獲小說若河洛行年紀廣陵妖

亂志者百二十家法孔子著春秋取羣書於百二十國
也因是有感遂纂蒙段事以為滇載記然滇故老猶歷
歷說平南事云潁川侯傅友德以文武才定昆明葉榆
身先甲士手草羽檄功為第一振旅入都勲高不賞絕
世千僂後百五十餘年憲臣始為奏請立祠滇城又當
時平南者有都督馮誠亦以讒忌遭難至今思其功而
愍其遇余因附著之平段事後無使沒焉

本朝

重刊四禮翼跋

陳弘謀

見前

明呂叔簡先生四禮翼吾師高安先生稱其可與
六經並存於撫浙時梓行其書傳誦通都而邊末
獨少余來滇中較刊四禮之後復梓此本蓋行禮
者其前必有所豫其後尤有所繼輔而翼之禮不
虛行也呂先生為萬厯中名臣敷歷外臺所至著
書汲汲以化民成俗為先務高安先生在浙意亦
猶是也自惟德薄能鮮未能仰希前哲萬一而勸

俗型方竊有志焉天理自具人心非有方土風氣之殊至道即在倫常非有極遠窮高之事人親其親人長其長於是書求之不遠矣事生篇末先生以祿養不逮兩親切終天之恨意悲語摯凡為人子莫不惕然動念余抱風木之痛尤不忍卒讀云

重刊孝經註解跋

陳弘謀

經者常也孝為天地之常經聖人孝弟之至可以通神明光四海民則之而孝有始終亦可以行成

而身立故孝經一書古今立教者之根本也伏惟
聖朝以孝治天下鄉會兩試並以孝經命題欲使天下
士子咸講求於根本之地亦既家置一編矣顧滇
地刊本多為場屋揣摩而於全經奧旨儒先講義
未能擇精語詳操觚之士樂其易從略知大意不
求甚解余竊病之嘗從玉峰徐氏所刊經解中得
讀孝經註解一書首列明皇之注繼以司馬文正公
范淳夫先生之詮解發揮經旨殆無餘蘊今特重加

開雕廣為流布俾讀是經者深思體究各得其章脈
指趣之所歸庶天地經常昭如日月將必衆著於親
親長長之義不徒視為弋取科名之具云謹跋

墓表

本朝

節士張葆孺墓表

侍郎

呂履恒

新安

嗚呼此

有清節士張公葆孺之墓也予嘗聞公行事不獲見

其人幸其孫月槎出吾門讀所為公狀慨然
想見其為人未嘗不激昂奮發興起其志氣
竊嘆士節不可不砥也公諱良伍葆孺其字也又
字允侯號黃石別號五聚其先蜀之巴縣人始祖
均德為元明威將軍入滇家石屏州世有隱德曾
祖汝橋舉鄉飲大賓祖煜然歲貢生官訓導父一
甲明崇禎庚辰進士累官至太僕贈大理寺卿妣
王淑人公生而岐嶷篤學有志尚入郡庠食餼性

善飲可一石至醉則豪吟睥睨旁若無人教子若
孫講讀遵大理公家法足不履公門士以此重之
吳逆之變建偽號開科趨仕者如鶩公避居山村
中飭諸子勿應試偽有司逼之力告養母不出後
二年王淑人卒論者高其節且服其先識云今夫
平居談節義章縫輩類能津津齒頰間或語及逆
節輒裂眦詆詈不使齒於人此非必盡偽亦天性
然也一旦時窮勢迫搖搖然視其身如懸旌惟風

颺所左右齷齪者無論已即一二自好者亦不克
反衆獨立矚然自拔於塵壒之表然則士之克以
節見者鮮矣至若分符守封疆為天子死其職如
顏魯公之使李希烈段太尉之擊朱泚前史亦難
之況以天末儒生去京師萬里宦籍未通身家可
念且際乎顛沛之頃者哉予所以表公之墓不禁
三致意於士節之難全也公年四十應明經生平
恂恂如童穉嘗以善退為學志不欲上人若無有

甚異者顧其於忠孝大節確乎有不拔之操而天
亦若善佑之俾其兩全無缺非積善有慶而能若
是乎往聞吳逆變時甘忠果公及葉公應樞皆以
致命遂志優典褒卹至胡尚書兆龍初為漢中副
使道聞難時匿其印於稻畦身為酒家傭卒用自悔
以全臣節斯亦奇矣易曰過涉滅頂不可咎也孔
子稱臨大節而不可奪若忠果公三人者或以死
事成仁或以潔身免亂事不必一轍然皆表暴於

世荷

國殊恩封馬鬣晉通顯可不謂榮焉若我張公一介
砥節不求聞於當世世亦鮮知之顧使其名湮沒
而不彰非後死者之責哉公生明天啓甲子卒康熙
戊寅得年七十有五葬鄉飲公墓側卒後五月
始授南寧訓導配許氏有淑德與公偕老年八十
七乃終子五人德宿歲貢生景宿應恩貢生未授
卒以子貴贈檢討吉宿歲貢生台宿早卒元宿庠

生女一人孫十二人自景宿出者曰漢癸巳進士
由翰林院庶吉士授檢討即月槎也嘗為予述公
軼事及其性行甚詳又曰公承家垂五十年不替
先德易簀時謂其子孫曰吾每思大理公宦蜀事
悲不自勝有終身之恨乃今然後可見吾祖若父
於地下矣其守身以事親如此嗚呼此其所以為
節士歟

誌銘

明

恭肅嚴公墓誌銘

大學士 王錫爵 太倉

今上萬厯中大臣之以清德著望受天子特達知所拔擢待遇皆異等而未竟其用以死者海內益有三公諸城邱簡肅公檉瓊州海忠介公瑞與今昆明嚴恭肅公清先是嚴公謝太宰事歸上數問閣臣嚴尚書病愈否會本兵缺則特旨詔補公如楊襄毅故事又特使使者馳傳趣公行又數問閣臣嚴尚書何時來已公疏至具

言臣實病且廢不勝首邱私念以負上惟上哀察上不得已停筆欲署其奏久之方許比越歲上優禮歸老重臣又首晉公太子少保給廩米輿夫無何計聞上若曰是惟予萬里親臣贈卹故事外宜有特加於是閣臣議端僖恭肅二諡以請上又特旨點用今諡其終始注眷殷繁款篤尤兩公所未及云公字直甫號寅所其先五代祖名子敬者自浙之嘉興徙居滇祖曷父春塢公鏤以公貴得累贈至資政大夫刑部尚書祖母董氏母余

氏俱夫人余夫人生四子公最少而咄咄奇悟鄉先達
光祿施公昱擇壻得公以女歸之嘉靖癸卯舉於鄉明
年成進士除富順尹富順故劇邑或以調公此未淬之
劍而輕斬蛟斷犀耶公謹謝曰小子何敢抑余劍也乃
方在治中惟工之所鑄而擇利可乎至則能聲大騰以
救荒課為天下最丁母憂後除邯鄲其治如故操尋召
入為工部屯田司主事歷負外郎郎中督修外城及九
陵皆斤斤謹出納侵牟吏膠手所省費以巨萬已工成

當叙陞公辭不受受加俸丁父憂復除兵部車駕車駕主行郵政以清強敢任怨聞坐忤出知保定府會歲旱多盜公政先保民歲既漸熟乃具為條教劇俗飭蠹犁然有理故事三輔郡歲籍民充京師庫役公議罷之至今稱便居保定三年課復最歷陞易州兵備副使陝西叅政四川按察使即其地轉右布政使所至自撫按特舉及兩京臺諫會舉不下數十疏隆慶戊辰擢都察院右僉都御史巡撫貴州尋改四川公故川吏知其民所

疾苦乃具籍川課之當輸京者議割二十萬金就近改
給陝西軍餉罷郡縣卒之團操成都擾民者貢番入邊
則為定限額數額外不得浮一人他約束一切以惠利
為本而痛持豪家悍吏以法以是士大夫譽誹常叅半
而內江趙文肅公獨深知之會有以流盜誑公當落職
趙公力爭得予告候調及後五年起督鴈門關不果改
貴州入為南大理寺卿尋改北歷刑部吏部右侍郎復
自吏部陞刑部尚書上之知公自其在刑部能執法不

飢權勢始既柄用典銓則日夜討故事論官材丞掾以下皆親為標署楊遵彥之默識黃次公之至精不能過也中外吏師其廉儉直牘之間幾無一跡上孳孳以太平屬公且未艾而公病歸矣歸之日遣使慰勞仍賜馳傳以萬厯庚寅年六月二十八日薨於家距其生嘉靖甲申年四月十八日得壽六十有七公性檢厲勤於事其操行嚴於趨舍辭受尤凜凜所居官身自與僮僕食麤衣敝蕭然也橐中裝雖圖書琴鶴不取諸人蜀王慕

公使使致扇餌微餉而不受初拜尚書貧不能具服色束素犀帶以朝其輩類或指戲之公釋褐時玳瑁七品帶故在耶公笑曰不然夫犀帶不裝金安知非玉吾顧恐難為上耳蓋公之內行修潔與海邱二公略同而二公喜谿刻標異稍闇於大體乃公獨薰然長者色溫氣和人無賢不肖貴賤皆禮接之其行法處議本人情計久遠無崖岸峻物之行謹咋抵掌之談以故明主眷遇尤渥而海內至今稱大人之能安國家鎮雅俗者必首

公云銘曰公起滇南萬里遇主不介而親其惟德舉試吏一同為郎再考環轍方維頌者交道中丞之節于蜀于黔斤斤其明濯濯其廉入典法臺不飢三尺以晉冢卿式是百辟胡威之清惟畏人知蘇章強切以忠見思古社稷臣待公屈指千載遭遇未究遐祉鬱乎高山司空取營埋石其墟載以嘉名曰惟帝賚曰允師錫尚俾來許仰止無斁

賦

明

金馬山賦

僉事 劉寅 崞縣人

蓐收柄靈房星聚精超鴻蒙而含秀條凝結而成形此
金馬之山所以置陬訾而奠昆明也在昔神禹受命爰
分九區表嶽鎮之崇崇隔方維之頓殊有岱有華抗東
西以屹若曰衡曰恒界南北而截如曠哉梁益併包坤
隅功不假於疏鑿地獨鍾乎膏腴起層巒之嵯峨控滇
南之故墟斯谿衍之巖谷駕綿邈之方輿造父固莫施

其銜勒王良亦難範以馳驅觀夫蔓草垂駿尖風批耳
白月懸瞳青松掉尾漬赤濡以湛露流汗溝之邈迤鑄
莫待乎棠溪產非資於麗水形類騰驤之騏驎勢似振
鬣之騄駼過日影之須臾摩蒼旻於尺咫迨夫噓氣成
雲噴沫起風障泥炫熒熒之彩霞擎纓繞煌煌之流虹
迅雷張其猛烈疾電助其威雄瀉甘澍以注下卷拳毛
之濛茸疊巘益翠巔崖增紅洞扇啓廐閑之弘敞鶩聲
響和鸞之玲瓏萬騎仰觀而辟易羣夷睨視而驚冲至

於岌業歸巍岩堯嵩萃或奔如驚或驟如突峻拔天脊
峭削風骨翦翦森爽隱嶺疊鬱杳橫亘於百里擬長城
之砢砢是宜拱帝京之尊嚴障大藩以寧謐也或有野
老詰予而言曰子徒見其小而不窮其大知其名而不
究其實吾將為子陳之元黃肇分氓生蚩蚩若魚若蟲
無識無知聰明聞出命為君師立一代之典章成四海
之雍熙嗟惟此邦視為外夷境荒荒而泯泯水漫漫而
瀰瀰姚姒置之不即顧問商周鄙之不遑保釐俾昏迷

而弗悟竟風靡於侏僂楚命莊蹻辟地遠來自王於滇
顧瞻徘徊君臣之分少定天叙之典未諧漢武奮志勞民
費財命張騫而遠出弭使節而虛回亦有孝宣不務大
體慕神怪之恍惚行禋祀之瀆禮王褒馳驛而西上僮
致一奠而乃已遺祠廟於巖阿謾冥摻而遠紀唐畏箠
巔之跳梁宋限大渡之涯涘元雖小安亦何足齒猗歟
皇明撫有萬方聖武神文巍巍堂堂既底寧於華夏遂
有事於戎荒命矯矯之虎臣揮天戈而奮揚直指雲南

埽除櫓槍截長鯨之鬚鬣剗妖狐之肺腸顯允黔寧智
勇忠良威已施於戡定恩復盡於胥匡化強梗為禮義
變椎卉為冠裳揖讓之風濟濟絃誦之聲琅琅紹述前
烈適有惠襄招攜貳以誠信銘頑嚚以慈祥國公繼之
綱紀益張載平安南功業彌昌總制仁賢淑旂綏章來
鎮來臨克柔克剛致遠人之盡服邁前哲而有光俾金
馬迴然而特立與碧雞相對而相望小姑息之宋元陋
怯弱之漢唐夫然後知皇明之盛德冠古今而莫並紀

昭靖之殊勲垂悠久而不忘余聞其言拜跪嘆嗟遂為
之歌曰金馬之旁兮有稻有秔金馬之陽兮有郭有城
臣宣旬其善政兮民勤事乎農耕咸天心而弗渝兮願
永享夫千萬之太平

戎旅賦

楊慎

見前

恭承恩譴兮於役滇越捐佩江臯兮解紳雲闕三陟崔
崔兮九折舐舐不日不月兮遂屆窮髮撫孤旅而惛眩
兮拚衆困而惻心悵圭籥之駸邁兮逾四稔而迄今父

母孔遠兮懿親離而北南類連遠而分衢兮似同波而
殊潯慈烏忻於共巢兮恒鳥悲乎異林彼纖羽之微族
兮亦命侶而踟蹰何生人之含靈兮乃離羣而弗如詠
清人之介駟兮感放士之鳴鵲姬公畏於熠燿兮尼父
咎夫螻蛄屈託乘於螭豹兮莊寄徑於鼃鼃在聖哲而
固然兮攬古人而乘歎哀吾生之罹郵兮背中土而播
荒粵戴盆而伏堪兮望崦嵫之末光神悅恨而蜚颺兮
形嚮卷而愴囊睇孫水之浩渺兮瞻靈闕之峻極聆猩

狸之夜啼兮履狒狒之朝跡尋終古之攸居兮問祝融
之昔宅胥靡登而不懼兮魑魅過而奚慄岨岨駭揚兮
含沙影流喟茲徂春兮忽焉杪秋月令殊於九州兮瘴
卉華而歲周若有人兮好我攜旨酒兮思柔采檳榔兮
綴扶雷贈相離兮結忘憂牽鵲雞兮為脯露江魚兮為
修滇歌兮爨舞白日逝兮元景浮獨持觴而懷遠兮雜
歎歎其向邐遂還軫而休室兮隱零雨乎寂夜引簟枕
而假寐兮遙歸夢乎親舍家人嘻以疑語兮閭里紛其

來訝衆雞鳴而驚余兮晨光昀乎東射悵夢歡而覺悲
兮淚承睫而交下假靈氛以歷占兮援龜頤兮余謝曰
明廷其布德乎子行歸乎肆赦系曰莫靡荒服自中古
兮日月之表燭不普兮章亥步窮禹罔睹兮蘭津開道
行商苦兮碧雞望祭使者阻兮子亦何為恒此土兮命
兮不祥順勿忤兮樂天知命云何憮兮

滇南賦

知縣
俞 緯 楚雄

滇南草木子嘗慕司馬子長之遊恨其時初事南服心

夢體倦役目騁耳未足以盡其大觀也恍然言於西蜀石潭先生曰夫人居勝地則其志朗其御遠處偏安則其中屈其氣索此牽乎地者也又讀帝系舜以諸馮而繼命西伯以岐山而造周為之而已曷與地謀此係乎人者也先生以余歟處滇者乎請誦所見聞而就正焉夫滇之處絕鎮也地衍西南之域天文井鬼之分肇自巨唐宅西於昧谷禹貢導水於南溟莊躋據衆而可王既通五尺於嬴秦迄乎漢氏置五郡鑿昆明張騫之通

西徼諸葛之事南征控八垓於神州闢萬里之煙雲廓
瀘江而為門掘西緬以為塞接交益而竝峙抗崑崙之
重扼繫乎數陸之所湊族類不減乎中土或炫爛之怪
錯奄八區而誰伍於前則跨帶交趾連延南海危聳撐
空懸石雲靄溪汨汨而渚流谷掩掩以伏偃途迷迷乎
衡宇亘萬里而愈遠於後則據躡吐蕃枕騎石門崎嶇
跳趺要害之屯北指轅以岷巴復遠御乎隴右背長江
以為塹還十畛而錯繆於東則右綿施鬼萬壑所充嵩

峻岿岿肩鼇柱空涵沃野於千里負天限之闕垣引長
渠於二廣卻風門於辰沅於西則遙制八百控有猛密
老撾肢屬千崖附籍皇圖遠攝乎遐陬獷悍馴擾於帝
懷恒懇懇以納款又何見乎蒿萊其封域之內則夷險
崇卑雄據千里長林邃谷屏嶺塹水蓋將自其大者而
觀之其山則龍盤鳳翥虎踞蛇伸岡巒拱衛翠壁霄青
左哀牢右太華陽瓜有天耳之扼隘銀生連烏蒙以接
霞牟尋所嶽之點蒼王褒使祀之金碧蜻蛉崇峰修谷

成會要之區。柘南嶺嶂摩雲為控扼之邑。於是乎竹箭
緣壑。楊柳臨岸。橘柚抽枝。松柏挺幹。梭羅婆羅之殊其
華。棠梨榭子之黃其實。紫榆杏椶。椒檉杉漆。木蘭椿槐
櫻李桃栗。園桂之馥秋馨。霜梅之傳春信。乳檀爍爍而
霞騰。安息靄靄而雲噴。卉則紫花白蓮。素馨杜鵑。薔薇
芍藥。芭蕉。紫菀。青蘭。芬芳於幽谷。山茶蔥鬱於峯巔。蔓
修藤吐種種。奇葩有標。其葉有灼。其華或經秋而傲霜
或蒸日而拂霞。爾乃孔羽珮翠鶴頂冠。朱雉雊素鸚

謁人呼蛤蚧穿其木鸛鶚鳴其陰寶樹巢珊瑚之鳥菖
山來鸛鹄之吟鷹隼鷺搏鳥鳥反哺白鵬于飛翡翠啄
霧子規夜作而促耕燕雀棲暖而春至翅迴鳴號戾止
乎其內獸則熊羆咆號於深林虎豹長嘯而風烈夕羊
畏露狡兔迎月猩猩夜啼猿猴競捷松鼠之攀緣神鹿
之隱穴犀象噉牙豪豬刺簪窮狐假威犛牛踞山踟躕
乎其間珍則有琥珀丹青珠瑁瑕英金沙銀礦川媚山
靈瑪瑙珊瑚絕蘊寶并錫鐵銅鉛石綠碧璚果則無花

猩猩胡桃松實檳榔無柯南棗荊棘搖顙香橙纍纍金
橘蜜桶獅頭同族異育羊桃橄欖柿榴御霜或託根於
崆峒之陰或奉蔭於圃囿之陽其浸則滇池嘉利滄水
洱海異龍陽宗之湖撫仙星雲之陂滴瀝滲淫會其流
涓於決灋成其大漑湫澗浮空澎湃噓噏百川洗滌
塵隘乃若秋月懸波千風轉幌飛沫起濤揚瀾溢浪圓
景當天彩雲蕩漾溟溟濛濛色連霄漢又若瀾滄麗水
金沙元江橫襟濛帶山陵懷襄圓淵九迴以懸騰溢流

雷響而電揚長江決漵峻湍崔嵬盤渦谷轉淩濤山頽
渾淪浩淼乍挹乍堆爾乃泄瀉湧鹹於浚井採山煮水
於鹽池內帑輸賦巨商擅貨於是乎蛟龍隱灘鼃鼃處
水乃見怪物興雲致雨其族則有長鯨吞舟修鱣吐沫
金線竹釘水母蚌螭江公大頭康郎細鱗鯖鰐鯢鯢
蜃蠃蝟螺螄蝸鯽目蝦噴霓鱗甲錐錯煥爛錦斑沂回
順流唵喁沉浮其四野則邱陵墳衍原隰陂渠溝洫暇
畛黍稷離離池塘既隩高城深池關譏啓柝江梁濟水

寢廟綿五世之勲巨室端維垣之矩喬木陰陰朱黻靡
靡其居民則高門鼎貴魁豪岸逸流寓多齊魯之昆戍
遣悉吳越之裔其間雖有毒獠烏蠻鳩獠呬慄惟構巢
於巖阿結茅於山脊友麋鹿之與木石竟莫伍於廛市
觀郊隩之富輿賈京邑之綱紀帝王之外援開國之弘
宇斯蓋宅土之所安業觀聽之所溢美此其大較也然
此特山川之粗也乃若天有至粹地有至精協氣昭宣
名世挺生施全之傳毛詩許淑之授五經張隆之墓擾

狐兔揚惠之孝感神明文章政事蔚若王昇風裁凜然
燭若張叔董文彥義以拒賊死睢陽之忠呂季平誓不
附雍茂子卿之躅傳寶南州人傑仲宣齊名經術張英
身代時勉之罪郭文秀發相如之曲和光道人廉惠先
生恥干利祿居恬政明又若爨字釋蚪斗之文筮師精
卜數之揲麥宗通番蠻之書草書綴義之之帖義若用
之節若方玘出將入相若一清守死善道若繼魯廷壁
剛直不阿有澄清當世之志希載博雅修潔達拯溺亨

屯之體近則山嶽炳靈風氣弘啓英雋迭出未可枚舉
當盛世而擅名稽海內而為擬是故游談者之樂譽景
行者之仰止石潭先生喟然嘆曰壯哉吾子其善遊乎
余舊有志於是縱言琅琳實獲我心滌我之沉疴敞我
之靈襟奇奇怪怪眩恍奪神而今惜其去子而之湖荆
也滇雲子怫然不懌曰石門劍閣三巴綿絡楚王夢遊
之陽臺大禹黑水之疏鑿岷峨掇之以舒抱江潼藉之
以披廓物不終聚復云駕言泣然淋淋不知其然

雲南通志卷二十九之十二